



A son siet e mieze, l'ostîr al è perples... al varès un grum di robis di fâ: scjamâ de rêl lis leziions de dî dopo, lei une tesi che no je sô par inventâ conclusions che nol capîs, lei un libri che nol veve in programe di lei par che al à chês stupide idee che no si pues presentâ un libri cence vêlu let, o inmò, magari, mangjâ alc par cene, che al sarès vonde...



Al cjale la liste des robis di fâ - si scrîf une ogni dî, metint dentri parfin robis come taiâsi la barbe e lis ongulis, che si no a cheste ore al sarès un bigfoot dal Friûl di mieç - e insome, framieç di chês si inacuarç che, gjavant chês za fatîs (scrivi mail ca e là, meti a puest cuatri vistîts sporcs che a son li di tant timp che aromai a van ator pe cjamare di bessôi, e altre robis utilis ae sorevînce), si inacuarç che nol à fat nancje une robe che e sedi dome par lui. L'apontament al è tor vot e mieze.

Une ore sole, i vanze.

Pobon, une ore in dî bisugne simpri robâle e platâle in sachete, cence mai fâle viodi a di nissun, che si no ti robin ancje chês, e dopô vêle robade scjampâ intun cjanton a fâle sù e mangjâle...

E alore vêlu, che al mole dut e al met dongje une bire e patatinis di puars, matitis, un notes regalât e cjolt di Tiger e Jeff Buckley a dut volum... e vie, a dissegnâ.



Doi vencui, al à di fâ, ancje se nol sa ben cemût che son fats...

Al trafiche, al cjante, al bêf, al mangje... e bon, i saltin fûr, chescj vencui, e cuant che ju à finûts, un messaç di sô sôr lu torne a puartâ in ca.

Da setu?

Cjase a disegnâ!

(Ma setu coion, che o sin ducj ca?)

No, no jal scrîf, chest ultin messaç ma il cidinôr dal telefonut cun dut che si viôt che e à let al è come se.

Par un moment i ven tal cjâf di no lâ a viodi se al à vinçût o mancûl, parcè che met câs che al vedi di vê vint - che insome, al saveve di vê presentât un biel lavôr - a lui, lis premiazioms lu fasin sintî simpri come se al volès jessi di dute une altre bande, e di podê vê un sosia, di podê mandâ tal sô puest. Bon dai... viodìn di movisi, al pense intant che al cjale, tal mûr, ducj i dissens dal lavôr che al à presentât, che pardabon a son un tichinin incuietants... demonis gjaponês... ma ce dal ostie i isal saltât sù? Al vierç l'armaron e al tire fûr ce che i covente...

E dopo nuie, al è dut di presse: cori rivâ tart, restâ in pîts daûr di ducj cun cualchidun che al va indevant a scrivi *dulà setu?* intant che al è sentât doi metros denant di lui, e la musiche, lis autoritâts, e ae fin al sucêt: al à vint il premi leterari plui impuartant inte sô lenghe mari!

FIESTE!

FIESTONE!

E un moment dopo i pâr di jessi di gnûf cjase sô, devant dai dissens, ma cun in man il libri che al à la cuviertine compagne di ce che al à devant dai voi.

Al vierç l'armaron, e un om in dut e par dut compagn di lui, cidin cidin, al va dentri e si plate tal scûr, framieç dai picjadôrs come se al fos une cjamese stirade.

Grassie Rafaêl, i dîs l'ostîr sierant l'armaron, cence di te no savarès cemût fâ.

***Conte scrite vuê matine in dîs minûts dal Ostîr,
par ringraciâ ducj e dîsi che al è une vore
ma une vore content,
di vê vinçût il San Simon 2015
#494***

